

四庫全書

子部

欽定四庫全書

子部
冊府元龜卷八十一

詳校官中書臣瞿 照

員外郎臣牛稔文覆勘

總校官庶吉士臣何思鈞

校對官監丞臣張曾炳

謄錄監生臣徐如灝

欽定四庫全書

冊府元龜卷八

宋 王欽若等 撰

帝王部

創業第四

後唐莊宗太祖長子年十一從太祖討王行瑜因令獻
捷昭宗一見駭之除隰州刺史尋改汾晉二郡皆遙領
之天祐五年正月太祖厭世帝嗣晉王位四月召周德
威軍歸晉陽汴人既見班師知其國禍以為潞州必取

無復再舉遂停斤堠梁祖亦自澤州歸雒帝知其不備
率親軍直抵夾寨破之梁軍大敗招討使康懷真得百
餘騎出天井關

事具帝王
謀畧門

帝乃班師晉陽九月邠岐蜀

三鎮復大舉攻長安帝遣李嗣昭周德威將兵三萬攻
晉州以應之三鎮攻長安梁祖懼自雒率親軍屯於陝
州令其將尹皓將兵赴援平陽周德威與尹皓之師戰
於神山北梁人大敗六年七月邠岐劉知俊遣使來告
將大舉討靈夏兼收平關輔請出兵晉絳以張犄角八

月帝御軍南征令周德威李存審丁會統大軍出陰北
關攻晉州刺史邊繼威登陴拒守梁祖令其將楊師厚
領兵赴援屯於絳州我軍攻城急小校萇諫募兵寡不
敵而退我為地道壞城二十餘步城中血戰拒守夜復
乘城汴軍至蒙坑周德威逆戰敗之斬首二百級師厚
退保絳州七年七月茂貞知俊及邠州楊崇本各遣使
來告言靈武韓遜夏州將李仁福朋附梁孽屢犯邊陲
請出師協力以討時岐人言劉知俊三敗汴軍於寧州

韓遜危憾岐隴之師大舉決定取河西帝命振武節度使周德威將兵萬人西渡河以應會劉知俊為岐人所構乃自退九月周德威軍旋晉陽十一月梁祖欲兼并鎮定遣親軍三千入于深冀鎮州王鎔懼求援於帝帝遣周德威率軍屯於趙州梁軍王景仁等營於柏鄉帝遂親征八年正月周德威史建塘帥三千騎致師於柏鄉設伏於村塢間遣三百騎直壓賊營賊軍怒悉其軍結陣而來德威與之轉戰至於鄆南賊陣橫亘六七里

時我軍未成列李存璋引諸軍旋陣於野河之上賊五百人薄我爭橋鎮定步軍偏師與之血戰賊敗而復整周德威李嗣源李存璋等大破之斬首二萬級餘賊棄深冀而遁德威與史建塘前軍徇地邢洺先馳檄諭邢洺魏博衛滑諸郡縣曰王室遘屯七廟被凌夷之酷昊天不弔萬民罹塗炭之災必有英主奮庸忠臣効順斬長鯨而清四海廓妖祲以泰三靈予位忝維城仍當分闡念茲顛覆詎可宴安故仗桓文輔合之規問羿浞克

狂之罪逆温礪山傭隸巢孽餘克當僖宗奔播之初我
太祖掃平之際束身泥首請命牙門包藏姦詐之心惟
示婦人之態我太祖俯憐窮鳥曲為開懷特發表章請
帥梁汴纔出荏蒲之澤便居茅社之尊殊不感恩遽行
猜忍我國家祚隆周漢迹盛伊唐二十聖之鎡基三百
年之文物外則五侯九伯內則百辟千官或代襲簪纓
或門傳忠孝皆遭陷害永抱沉寃且鎮定兩藩國家巨
鎮奠安民而保族咸屈節以稱藩逆温惟仗陰謀專行

不義欲全吞噬先據屬州趙州特發使車來求援助予
情惟盪寇義切親仁躬率賦輿赴茲盟約賊將王景仁
將兵十萬屯據柏鄉遂驅三鎮之師授以七擒之畧鶴
鵝纔列梟獍大奔易如走坂之丸勢若燎原之火殪尸
仆地流血成川組甲雕戈皆投草莽謀夫猛將盡作俘
囚羣夫既快於天誅大慙湏懸於鬼錄今則選蒐兵甲
簡練車徒乘勝長驅翦除元惡凡爾魏博邢洺之衆感
恩懷義之人乃祖乃孫為聖唐赤子豈徇虎狼之黨遂

忘覆載之恩蓋以封豕長蛇憑陵薦食無方逃難遂被脅從空嘗膽以銜冤竟無門而雪憤既聞告捷想所慰懷今義旅徂征止于招撫昔耿純焚廬而向順蕭何舉族以從軍皆審料興亡能圖富貴殊勲茂業翼子貽孫轉禍見機決在今日如能詣轅門而効順開城堡以迎降長吏則改補官資百姓則優加賞賜所經誑誤更不推窮三鎮諸軍已申嚴令不得焚燒廬舍剽掠馬牛但仰所在生靈各安耕織予恭行天伐罪止元克已外歸

民一切不問凡爾士衆咸諒予懷於是帝親御軍邢帥
王檀懼請師于雒梁遣其將徐仁溥將兵五百夜入邢
州助檀固守帝令張承業李存璋以三鎮步卒攻邢州
遣周德威史建塘將三千騎長驅澶魏帝與李嗣源率
親軍繼進王師所至壺漿塞路郡邑長吏村閭文學咸
扣馬言曰久罹喪亂獲見義師帝躬自臨問勞之軍法
甚嚴秋毫無所犯但討其拒命者時汴軍自王景仁敗
後殺戮大半其餘漏刃亡散皆青徐鄆諸道之軍各

歸本鎮梁祖遣楊師厚於河陽招聚亡敗之衆旬餘方得萬人二月帝自維磁相三郡次于洹水謀報汴滑之軍據黎陽周德威進至臨河己未魏帥羅周翰出兵五千塞石灰窰口周德威以騎三千掩擊迫入觀音門帝舍於狄公祠東西列營十數羅周翰閉壁自固我軍攻西南北隅城幾陷朱溫遣杜廷隱將兵五百送李振為魏博副使夜入鄴城是時朱溫出兵萬餘將渡赴援聞王師至棄舟而退鄆州步騎二千自黎陽來歸梁祖自

汴歸雒陽周德威自臨清徇地貝郡夏津高唐攻博州
下東望朝城攻澶州偽刺史張可臻棄城而遁進擊黎
陽下臨河淇門逼衛州掠新鄉共城是月梁祖在潞聞
我師將攻河陽率親軍屯白司馬坡令楊師厚戒嚴八
月幽州劉守光僭稱大燕皇帝十二月帝遣周德威劉光
濬李嗣源及諸將率蕃漢之兵討之九年正月燕將王
行方等以部下四百人來奔二月梁祖率舉河南之衆
以援守光三月周德威遣李存暉攻瓦橋關四月李嗣

源攻瀛州皆下之五月德威大破燕軍於羊頭岡斬首五千餘級自涿州進軍于幽州城下六月梁祖為其子友珪所弑八月友珪遣其將韓勅康懷英牛存節率兵五萬急攻河中朱友謙遣使求援帝令李存審率師救之十月帝自澤潞赴河中遇梁將康懷英於平陽破之斬首千餘級追至白徑嶺友謙會帝於猗氏梁軍解圍而去十年正月德威攻順州二月攻安遠軍皆下之三月攻廬臺及古北口五月壬寅朔劉光濬逼營州刺史

楊靖以城降得李知諱馬步兵四百因令五院將李益
權典州事六月帝遣監軍張承業至幽州是月收下莫
州九月守光率衆夜出遂陷順州十月入檀州德威自
涿州將兵躡之守光循山而南德威追及大敗之守光
復之譚城十一月帝親征幽州十二月執偽燕主劉守
光并其父仁恭班師晉陽次行唐鎮州節度使王鎔迎
謁於道路鎔啟曰燕主劉太師頃為隣國謀之不臧患
生膝下今既伏罪履薪之會僕欲挹其風儀可乎帝促

命主者破械引守光仁恭至與鎔答拜同宴久之十一年正月至自幽州是日於汾亭令軍士數百組練係仁恭守光號呼而入與其黨李小喜鄭臧斐皆伏法是月鎮州王鎔定州王處直再遣使奉書推冊帝為尚書令帝可之乃撰日受冊開霸府建行臺如武德故事帝以燕薊初平將軍南伐七月帥師自黃沙嶺東下會周德威王鎔於趙州大軍進至洺州徇地而還十二年三月梁主朱友貞分魏博六州為兩道以賀德倫為魏博節

度使張筠為澶相節度使魏人不從乃歸於帝帝命馬步副摠管李存審自鎮州帥前軍先進屯臨清五月帝帥親軍會之德倫遣從事於司空陳密旨言軍士張彥為亂軍之首迫德倫上章請却復六州大王鎮撫魏人宜誅首惡及帝進軍次於永濟張彥選銀槍効節軍五百人皆勇悍者持矛仗戟自衛而來帝登驛樓數其罪而斬之六月入府城撫勞軍士賀德倫上符印請帝兼領魏鎮帝承制授德倫大同軍節度使是月帝遣騎軍

五百襲德州拔其城七月攻梁澶州下之八月復為梁將賀瓌所陷十三年三月攻梁衛州降之進攻磁州四月攻洺州並皆拔之相州節度使張筠遣人納款師旋於魏州五月還晉陽八月大閱師徒進攻邢州令降將張溫率汴軍五百於城下招降之邢州平九月帝還晉陽梁滄州節度使戴思遠棄城遁舊將毛璋入其城復命明宗帥師招撫之毛璋以城降以李存審為節度使是月貝州降河朔悉平十四年十二月黃河水合帝觀

兵河上汴人據楊劉城緣河數十里間列柵相望我軍
急攻皆平之進至楊劉城中登堞者甲士三千帝率善
射者萬餘環城馳射步兵持斧斬其鹿角以葭葦埋塹
帝率先負葭葦以勵士衆四面鼓譟拔戟乘城其衆因
潰騎軍掩擊自辰及酉斬戮千計徇地至鄆濮而還閱
兵於魏州時幽州盧龍軍節度使蕃漢馬步摠管周德
威帥幽薊步騎之師三萬橫海軍節度使蕃漢馬步副
摠管李存審帥滄景步騎之師萬人成德軍節度使王

鎔遣其將王德明帥鎮冀步騎之師三萬昭義軍節度使李嗣昭帥澤潞步騎萬人安國軍節度使李嗣源帥邢洺步騎之師萬人義武軍節度使王處直使其將帥易定之步騎萬人麟勝雲蔚新武等州諸部落奚契丹室韋吐谷渾等馬萬匹總河東魏博十鎮之師閱於魏州部陣嚴肅精甲曜日師旅之盛近代未之有也梁將賀瓌王彥章帥兵屯於濮州北行臺里結壘相持百有餘日十五年六月帝與梁軍戰於楊劉大破之拔其四

寨十二月帝令軍中老幼悉歸魏州寨井夷竈起軍赴
汴攻濮陽拔之李存審城德勝夾河置禦捍之備十六
年四月梁將賀瓌攻德勝南城圍塹既周又以蒙衝戰
艦斷其津渡百道齊攻帝陣於北岸親從將王健選勇
卒三百人斬其竹纜繇是得渡梁軍棄城逃遁帝命騎
軍追襲至於濮陽十二月帝軍於河南御鐵騎千餘突
入梁陣諸軍繼進左右斬擊梁軍大奔獲馬三千餘匹
俘斬萬級十八年八月鎮州王鎔為其將張文禮所殺

帝援鎮州行營偏將符習成德軍兵馬留後以所統鎮
冀兵進討又遣閻寶史建塘將兵以益之文禮聞王師
至憂悸病疽而卒子處球代其任十九年九月鎮州平
鎮人請帝兼領因以符習領天平軍節度使同光元年
二月諸藩鎮相繼上牋勸進四月遂即帝位

晉高祖憲祖第二子

憲祖以上事具
帝王帝系門

後唐明宗初為代

州刺史妻以愛女領親騎左射軍天祐十三年梁將劉
鄩率兵攻鄴城莊宗至自甘陵未陣為鄩所掩截帝領

十餘騎橫槊深入收部伍而旋莊宗壯之十四年鄆兵陣莘之西北明宗從莊宗酣戰久之而塵埃四合帝與明宗俱陷陣中帝挺身躍劍反覆轉鬪行數十里遂敗鄆於故元城之東十五年梁將賀瓌設伏無石山明宗為瓌所迫帝為後殿破賊五百餘騎按轡而還十二月莊宗大蒐兵胡柳坡下衆號十萬總管周德威將左軍雜以燕人前鋒不利德威死之莊宗率步衆五千固守高陵以避敵之銳氣明宗獨完右廣伏於土山之下顧

謂帝曰梁人首獲其利旌旗甚整何計可以挫之帝曰臘候如此出手墮指彼多步衆易進難退莫若啜構飲水徐而困之且超乘徒行其勢不等一擊而破期在必勝明宗曰是吾心也會日暮梁軍列於平野不下五六萬人為一方陣麾遊騎迫我帝曰敵將遁矣乃請明宗令士整冑寬而羅之命左射軍三百人鳴矢馳轉漸束其勢以數千騎合之敵人迨夜旌旗皆靡而一角先潰三面踵之其牙若火爆之聲橫屍積甲不可勝計繇是

梁人勢削進營德勝渡矣十八年十月從明宗戰梁人於德勝渡敗梁將戴思遠殺二萬餘人十九年戰胡蘆套唐軍稍却帝覩其敵銳拔劍闢道肩護明宗而退人望之無敢襲者二十年從明宗觀梁人之楊村寨部曲皆不擐甲俄而敵出不意以兵掩明宗必將及背帝挾戰而進一擊而凶酋落馬者數輩明宗遂解其難是歲莊宗即位於鄴改元同光遣明宗越河懸軍深入以取鄆鄆人殆不知覺帝以五十騎從明宗涉濟突東門而

入俄而鄆兵拒我帝中刃翼明宗而羅於通衢寔然不
動會後騎繼至遂拔中城以據之汶陽遂定俄而平汴
莊宗朝官未顯者以帝不好矜伐故也唯明宗心知之
四年三月明宗討趙在禮于鄴會諸軍有變叩馬請明
宗帝河北明宗受霍彥威勸將自訴於天子遂給諾諸
軍諸軍亦恐事之不果而散者甚衆明宗所全者惟常
山一軍西次魏縣帝密籌於明宗曰猶豫者兵家大忌
必若求訴宜決其行某願率三百騎先趨汴水以探虎

穴如遂其志請大軍速進夷門者天下之要害也據之
可以自雪安有上將與三軍言變他日有平手乎危在
頃刻不宜恬然明宗至相州遂分驍騎三百付之遣帝
繇黎陽濟河自汴水西門而入因據其城使人促明宗
明宗趨白馬渡繼焉及明宗犒師於郡莊宗親統師至
城之西北五里登高歎曰吾不濟矣繇是莊宗從兵遂
大潰來歸明宗明宗尋遣帝率兵為前鋒趨汜水關收
撫亂兵俄而莊宗為親將郭從謙流矢所中是月明帝

入雒嘉帝功自總管府署陝州兵馬留後明宗即位改
元天成五月以帝為保義軍節度陝虢等州觀察處置
等使賜竭忠建策興復功臣時莊宗皇子魏王繼岌降
西蜀王衍督軍而還軍亂於雍繼岌見害朝廷又遣帝
慰撫諸軍示以恩旨自陝至雒秋毫無有犯者二月兼
六軍諸衛副使十月明宗幸汴以帝為御營使始次涼
水汴帥朱守殷叛命命帝董親軍倍道星行信宿及汴
城一鼓而登之守殷自屠其家賊中遂定詔以帝充宣

武軍節度汴曹等州觀察處置侍衛親軍馬步軍都指揮使兼六軍諸衛副使三年四月加同中書門下平章事興唐尹鄴都留守天雄軍節度管內觀察處置等使長興元年九月東川董璋悖命有制削奪官爵命帝為東川行營都招討使二年春以川路險艱糧運不繼帝懼人情有變請以急詔徵還朝廷然之四月復兼六軍諸衛副使六月改河陽節度使十一月以契丹犯雲中加侍中充河東節度使兼大同振武彰國威塞等軍蕃

漢馬步總管三年十月契丹引吐渾突厥犯塞秦王從
榮奏宜早命大將與范延光俱言帝可用帝素不欲為其
軍之副即奏曰臣願北行明宗曰卿為吾行事無不濟
即宣旨施行及受詔不落六軍副使帝却遷延辭避閔
帝即位加中書令移鎮常山末帝清泰元年五月復除
河中節度使蕃漢馬步總管二年夏帝屯軍于忻州朝
廷遣使送夏衣傳詔撫諭後軍人遽呼萬歲者數四帝
懼斬挾馬都將李暉三十餘人以徇三年五月移鎮暉

州帝心疑之召寮佐謂曰孤再受太原之日主上面宣
云與卿北門一生無議除改今忽降命豈以去年忻州
亂兵見迫過相猜乎又今年以千春節請公主入覲當
辭時謂公主曰爾歸心甚急欲與石郎反邪此疑訝之
狀固甚明矣今國家用后族委邪臣沉湎荒惑萬機停
擁今張昭遂延浩於鄴以延浩后之愛弟不加其罪是
失刑也副樞密使劉延朗黷貨賂抑功勲侯伯為之長
歎是失賞也二者皆去不亡何待吾自應順中少主出

奔之日覩人情大去不能扶危持顛憤憤於方寸者三年矣此際我無異志朝廷自啟禍機不可頽然歿於道路况太原險固之地積粟稍多若且寬我我當奉之必若加兵我當內告隣方北搆強虜興亡之數皎皎在天今欲發表稱病以伺其意諸公以為如何判官趙瑩懼形於色但唯唯桑維翰與漢高祖贊成其事乃不奉詔末帝削奪帝爵遣晉州節度使張敬達圍帝晉陽末帝既有詔促令攻取敬達長城連棧勇者盡其力工者運

其思日夜窮土木之力時督事者每有所構則暴風大雨平地水深數尺而城柵摧墮竟不能合其圍帝求援契丹俄遣人復書諾之約以中秋赴義六月北面招討指揮使安重榮以戍卒部曲數千人入城七月代州屯將安元信背刺史張朗率軍與西北面先鋒指揮使安審信引五百騎俱至八月懷州彰聖軍軍使張萬迪等各千餘騎來歸是月張敬達攻圍甚急帝親與矢石人心雖固廩食漸困九月辛丑契丹大酋長邪律氏率衆

自鴈門而南旌騎不絕五十餘里與南軍騎將高行周符彥卿等合戰時張敬達楊光遠列陣西山之下士未及伍而行周彥卿為伏兵所斷捨軍而退敬達等步兵大敗歿者萬人是夜帝出城北門與邪律相見因論父子之義明日帝與契丹圍敬達營寨南軍不復出矣是月末帝率親軍三萬出次河橋遣樞密使趙延壽分衆二萬為北面招討使又詔魏博節度使范延光統本軍二萬人屯遼州十月幽州節度使趙鈞領所部萬餘人

自上黨吳兒谷合延壽兵屯團柏谷與敬達寨相去百里彌月不能相通十一月戎王築臺於晉陽城南冊帝為大晉皇帝改元天福閏十一月甲子唐將楊光遠殺敬達以諸軍來降甲戌帝至昭義受趙德鈞趙延壽降已卯至河陽北節度使萇從簡降辛巳末帝自焚帝遂入雒都

漢高祖顯祖之子初仕後唐明宗列於麾下晉高祖為梁軍所襲馬甲連革斷帝輟騎授之取斷革者自跨徐

殿其後晉高祖感而壯之明宗踐祚晉高祖為北京留守以帝前有護援之力奏移麾下署為都校應順初閔帝出奔與晉高祖會於衛州謀欲害之帝率衆盡殺閔帝左右遂免於難末帝清泰元年晉高祖復鎮河東三年夏移鎮汶陽帝勸其舉義贊成密計晉高祖以帝為北京馬步軍都指揮使及契丹以全軍赴難大破張敬達之衆於晉陽城下有降軍千餘人帝盡殺之天福元年晉國建授侍衛馬軍都指揮使權點檢隨駕六軍諸

衛使尋改陝州節度使充侍衛馬步軍都虞候二年八月改許州節度使三年十月授侍衛馬步軍都指揮使十一年移宋州節度使十二月加同平章事五年三月改鄴都留守六年七月授河東節度使朝廷以常山安重榮狂悖漸露招致退渾白承福等在五臺山北以招契丹為名晉高祖患之召漢高祖賜宴密戒曰北門吾豐沛之故宅也今內有兇豎勾引近塞部落與朝廷生事吾今將幸鄴州以并州為巨屏遍揣大臣非公不可

作鎮當與李德琬交致宜勉是行副倚屬也十月吐渾
白承福與部族來歸始晉高祖以前月有詔委帝招誘
退渾節度使白承福等遲疑未決因使人謂之曰契丹
強盛方與同盟聖上已會割隸公合自守部落安重榮
將圖不軌朝夕敗亡天下之人已共棄矣况朝廷明有
告諭便可速來無待臨以兵威南北無向差之毫釐悔
無及矣承福等懼遂歸命焉帝優以繒帛米糒奏於河
東安置而重榮北遣記室盧陶傳檄遠近以吐渾達靺

契苾同起為名至是無一人赴者大摧其勢皆帝之謀也七年正月加侍中八年三月加中書令開運元年正月契丹南下虜主以大軍直抵澶州遣蕃將偉王率兵入鴈門少帝以帝為幽州道行營招討使大破偉王於忻口三月封太原王七月兼北面行營都統二年四月封北平王三年五月加守太尉九月契丹犯塞帝親率牙兵至朔州南陽武谷大破之四年正月虜王入東京諸侯皆附焉帝亦遣使送款給云有疾知邪律氏恃勝

傲下使漢兵饑寒縱蕃騎暴橫蹂踐鄭滑曹濮百姓為之一空必華戎相厭主客生變可坐而圖也繼發副使白文珂奉以織繒名馬密偵所為邪律氏亦以帝觀望不動生猜貳焉即以虜通事高唐英領安陽耿崇美領上黨偽侍中崔廷勳赴河橋且欲扼太原之衝也帝繇是偃戢旗鼓但示弱而已左右或勸帝曰契丹敗漢法而人心已搖可議進取之計帝曰夫兵法有急擊而破敵緩守而成功者隨時消息不可失也今北虜降我軍

十萬入據京邑內未有變其可輕議者哉且犬羊之性貪而好利利飽必去是其常也况冰雪已消虜畏其熱蓄銳待時理將未晚時潞府連帥張從恩遣使謀於帝曰某以勢迫懷雖欲詣虜帳去之與住一票明公帝遣回使答曰我以一隅之地敢抗天下之大乎君其行之當繼往矣從恩以為誠而帝甘言多此類也少帝北遷二月河東行軍司馬張彥威與文武將吏等以中原無主帝威望日隆羣情所屬三上牋勸進是月辛未於太

原宮受冊即皇帝位帝謂羣臣曰帝王稱謂孤已迫於羣情而遜避無所其國號正朔未忍遽改繇是降制以少帝開運四年改稱晉天福十二年遣都督史弘肇率兵討代州平之是月權晉州兵馬留後張晏洪權陝西留後趙暉權潞州留後王守恩並上表歸順二月權延州留後高允權丹州都指揮使高彥珣並以城歸命是月虜主還本國四月卒於鎮州之樂城五月丙申帝發河東取陰地闢路幸東京偽汴州節度使蕭翰迎郇國

公李從益知南朝軍國事戊申帝至絳州刺史李從朗以郡降六月丙辰至雒兩京文武官寮自新安相次奉迎詔賜從益死甲子遂至東京

周太祖慶祖之子年十八事後唐潞州留後李繼韜為牙兵莊宗平繼韜配從焉直天成中晉高祖領副侍衛以帝長于書計名置麾下令掌軍籍漢高祖累鎮蕃閩皆從之及鎮并州尤深待遇出入帷幄受腹心之寄開運末契丹犯闕晉帝北遷帝與蘇逢吉等勸漢祖建號

以副人望及即位以帝為樞密副使乾祐元年正月隱
帝嗣位拜樞密使會李守貞據河中朝廷遣白文珂常
思等討之七月西河師徒大集未果進取制加帝同平
章事即遣西征以安慰撫招為名詔西面諸軍竝取帝
節度八月二十日師至河中命白文珂營於河西帝營
於河東不數日周設長塹復築長連城以迫之二年五
月十七日攻城自是晝夜攻之七月十三日帝三砮將
士奪羅城二十一日城陷守貞自焚而死又於城中搜

索出守貞男崇玉崇緒崇英縑哥女喜哥延哥偽宰相
靖崧孫愿樞密使劉芮國師僧總倫司天監王廷秀博
士焦文傑偽滑州節度使張球澤州刺史劉仁祐忻州
刺史安在欽秀州刺史張延朗等二十五人秦王印及
四門旗龍鳳日月等旗傘扇玉鉞等差弓箭庫使劉延
珪露布以聞詔曰李守貞頃在前朝驟承委遇迨事先
帝復委藩垣効淺功微寵深位大而狡性難制小器易
盈茂義虧忠窮凶極逆江海不能流其惡鼎鑊不足快

其誅卿憤激於心義形於色覩茲妖孽志在剪除動息之間必思於經畧寢食之際無忘于寇讐撫士愛人分甘共苦躬臨矢石親冒梯衝揮戈而蛇豕就誅破竹而金湯失險氛靈既息宗社再安非我元臣莫隆景運朕之倚愛何止寢興言念辛勤無忘嘉愧九月加侍中十月契丹入寇帝受詔率師赴北邊謂諸屯戍壯士曰自虜王喪敗今纔四年幽州所屯其數無幾然而屢犯吾境屢傷吾民非彼驍雄蓋禦備之失者有三主將無謀

城池不固備預無素禦捍闕供其敗一也主將輕佻妄
謀躁進不顧利害輕用士民希覬功名以邀爵賞其敗
二也貪他羊馬互市往來姦利之人兩為間諜軍謀國
事泄之於敵其敗三也予昨者繕城池增堡障儲守備
之用料將校之才蓋欲自茲庶無敗事所在鎮戍當用
吾言凡虜小寇則進追大侵則保壁不得與蕃人交市
不得輕戰邀功民蠶麥登時黍禾熟日早令收穫俾入
城池偵邏警巡為民外扞亦州牧戍將之職也虜雖衰

破遠在沙場倏忽往來難為駕馭縱得一夫一騎不足為功但自保邊斯為上策况百年之虜未易卒除使國富刑清兵多馬衆彼則占風不暇款塞爭先予非畏胡服之有時耳自是邊上鎮戍專切戒嚴虜縱侵騷於民無損帝既至邢州而虜已退三年二月班師三月制授鄴都留守樞密使如故十一月十四日澶州節度使李洪義遣副使陳光德至鄴報京師有變羣小害楊邠史弘肇等又言后弟李業等遣腹心齋密詔至澶州令洪

義殺侍衛步軍指揮使王殷洪義恐事不濟乃以密詔示殷殷與洪義即遣光德馳報于帝光德既至以洪義意密啟于帝俄頃供奉官孟鄴馳驛來亦詔護聖左廂都指揮使郭崇等害王峻及帝仍命以首級馳獻太祖即集三軍將校諭之曰予從微至著披肝露膽置立漢家宗社先皇登遐親受顧託與楊史諸公彈壓經謀忘寢與食一旦無罪盡已誅夷予獨何生龜勉居世死歸地下無愧先帝爾三軍斷予首報天子各圖功業自此

長辭郭崇帥所管將校士卒伏於帝前言曰崇等從公
征行備嘗艱苦星行露宿畧無寧息侍衛令公忘身為
國不避怨謗護息邦家無名誅族遣誰致力崇等思揣
此事必非聖旨即是李業等奸權誣罔竊發假如此輩
使握權柄國得安乎必須披論以判忠邪何事信單車
之使輒欲自棄使千載被惡名乎崇等願從公入朝面
自洗雪盪除鼠輩以廓帝圖辭未絕郭崇遽領騎軍先
往澶州橋帝翌日為衆所迫不獲已遵路明日行次遇

內養鷲脫者隱帝之小豎也來覘太祖訊之對曰見名
前開封尹侯益鄜州節度使張彥超客省使閻晉卿鄭
州防禦使吳處裕令將兵守澶州帝謂鷲脫曰詔郭崇
殺我崇而不忍害我言為我論列兵士迴戈我力不能
制爾以此聞奏帝因寘奏狀於鷲脫衣領奏曰昨為兵
士擁至河上言京中誅史弘肇等盡非聖意請陛下密
詔內班擒縛李業等送至澶州詔諭兵士臣即却歸鄴
中一則雪將相之深冤一則安陛下之家國隱帝覽奏

疑不能決復詔李業輩示之於是盡害帝及王峻等親屬帝欲往澶州候驚脫至闕伺其詔命兵士肆言我輩家屬在汴未知存亡此不可往遂燒民廬舍鼓譟不可遏王殷率步騎從履冰而渡十六日趨滑臺節度使宋延渥迎謁于路十七日以滑之府庫縑緡賞諸軍大閱步騎於州城南帝誓軍曰朝令使侯令公等率大軍將至彼既成列不肯徒然我思道理必欲交鋒使匪朝天之意如其束手何制逆我之師欲全爾等功名不如奉

行前詔我以一死謝天子實無所恨諸將徬徨啟曰國家負公公不負國所以萬人奮命如復私讎侯益之徒安能為患保為公擒之十八日大軍至滑而南十九日過封丘時隱帝又令左神武統軍袁義前鄧州節度使劉重進繼率禁軍來拒望塵退走與侯益等軍屯赤關是夜俱退二十日兩軍相遇於劉子陂隱帝結營於七里店道西二十一日復陣於劉子陂帝令諸軍曰比除君側之惡無得犯蹕按軍不動者久之無何慕容彥超

揮戈奮擊步騎雲委李筠郭崇乃率兵禦之慕容彥超馬倒幾欲成擒而侯益張彥超袁義劉重進皆倒戈而來二十二日旦隱帝自砦乘馬將還宮而前鋒已及乃西南以避之事迫而郭允明遂行弑逆辰巳時諸軍畢入京城晚太祖將入宮門待罪進名朝太后以軍未整戢且歸舊第二十四日率羣臣起居於明德門外奏曰昨者左右熒惑輿駕蒼皇歸闕師徒未免驚動帝王出令其位難虛軍國事多早宜冊立嗣君以係人望伏請

太后行教令指揮太后令曰北京留守崇許州節度使
信高祖皇帝之愛弟也徐州節度使贇開封尹勳皆高
祖之裔子也俱列盤維皆分屏翰已委文武百寮六軍
將校議擇賢明以承大統二十六日帝率羣臣班於明
德門外起居太后獻議請以劉贇入承正統太后下令
宜備法駕迎贇於徐州即皇帝位即遣太師馮道備儀
注往奉迎二十七日帝率羣臣班於明德門外拜章以
新君未知軍國之事一日萬機不可暫廢請太后權臨

朝聽政二十九日鎮定言契丹入寇三道而來太后令帝赴北面軍前為都統帥相度進取新君未至其軍國公事委王峻已下商量施行其兵馬軍事委王殷勾當巡簡十二月甲午朔帝北征十九日六軍履冰渡河次澶州驛舍二十日早步兵前進帝於庭中省其裝發忽聞驛外闕譟聲如雷霆俄而士卒不繇門戶登牆越屋雲屯山積來迫帝曰天子請侍中自作劉家社稷盡矣縱然立得亦無好事却報讐於將校也亂軍得黃袍扶

抱帝加袍於背不肯解帝給之曰爾等解去我無所避也二十日帝上太后牋論列澶州三軍逼脅之事不獲已班師又言臣事先帝過承君父之恩及奉嗣君願竭腹心之効豈期禍難事與願違方擇當璧之賢又爽大橫之兆永言膝下何慰慈顏望太后以宗子待微臣臣敢不奉宗廟如本朝事太后為慈母悃欵之至祈戀增深太后令曰侍中功烈崇高德聲昭著剪除禍亂安定乾坤謳詠有歸歷數攸屬所以羣情推戴億兆同歡老

身未終殘年屬茲多難唯以衰朽托於始終載省來牋
如母見待感切深意涕泗橫流其諸誠懷難盡宣述是
日王峻以所立新君在宋州恐聞澶州軍變之事部下
為亂令郭崇率騎七百急赴之二十三日帝至韋城二
十五日至七里店東西步騎陳列是日百寮上章勸進
御營於臯門村二十六日太后以帝為監國中外庶事
並聽監國處分四年正月丁卯漢太后令奉符寶授監
國即皇帝位是日太祖自臯門歸大內御崇元殿即位

制以大周為號改乾祐四年為廣順元年

冊府元龜卷八

欽定四庫全書

冊府元龜卷九

宋 王欽若等 撰

帝王部

繼統第一

易曰大人以繼明照于四方孟軻亦云君子創業垂統
為可繼也仲尼刪詩定書斷自唐虞以下故軒轅之前
無所論次然學者多稱少昊乃黃帝之子逮乎堯舜皆
其裔也則知黃帝之澤及後世淵源深遠然自帝嚳已

往五材迭勝事畢纂緒此固不論及夏后氏之興櫛風
沐雨乘四載拯橫流鳥獸咸若烝民粒食功無間然子
啟賢明用克永世商有祝網之仁誅暴之義元元欣戴
亦惟舊矣雖太甲之顛仆典刑而流風善政浸于遺俗
有賢臣援而正之終能篤紹基緒姬周之興瓜瓞成頌
炎漢之慶大橫叶兆自爾明聖代興光昭前烈七世之
廟固可以觀德者矣

夏后啟禹之子禹東巡守至于會稽而終以天下授益

禹崩三年之喪畢益讓帝禹之子啟而避居箕山之陽

陽字一作陰避音壁

禹子啟賢天下屬意焉禹雖授益益之佐禹

日淺天下未洽故諸侯皆去益而朝啟曰吾君帝禹之子也於是啟遂即天子之位是為夏后

帝太康啟子

帝仲康太康弟

帝相仲康子

帝少康相子

帝宁少康弟 一云杼

帝槐宁子

帝芒槐子

帝泄芒子

帝不降泄子

帝扃不降弟

帝廛扃子

帝孔甲不降子

帝皐孔甲子

帝發皐子

帝履癸發子是為桀

殷帝外丙湯之子湯太子太丁未立而卒乃立太丁之弟是為外丙

帝仲壬外丙之弟

帝太甲太丁之子成湯適長孫成湯既沒太甲元年

史記

稱湯沒太子太丁之子外丙即位三年立其弟仲壬與書差互伊尹作伊訓曰惟元祀

十有二月乙丑伊尹祠于先王

此湯終踰月太甲奉嗣
即位奠殯而告

王祇見厥祖

居位主喪

侯甸羣后咸在

在位次

百官總已以聽

於冢宰

伊尹制百官以三公攝冢宰

帝沃丁太甲子

帝太庚沃丁弟

帝小甲太庚子

一云弟

帝雍已小甲弟

帝太戊雍已弟

為殷中宗

帝仲丁太戊子

帝外壬仲丁弟

帝河亶甲外壬弟

帝祖乙河亶甲子

帝祖辛祖乙子

帝沃甲祖辛弟

帝祖丁沃甲兄祖辛之子

帝南庚祖丁弟沃甲之子

帝陽甲祖丁子陽甲之時殷衰自仲丁以來廢適而更立諸弟子弟子或爭相代立比九世亂於是諸侯莫朝帝盤庚陽甲弟自河北五遷至河南治亳號曰殷行湯之政百姓繇寧殷道復興諸侯來朝

帝小辛盤庚弟

帝小乙小辛弟

帝武丁小乙子

為殷高宗

帝祖庚武丁子

帝祖甲祖庚弟

帝廩辛祖甲子

帝庚丁廩辛弟

帝武乙庚丁子

帝太丁武丁子

帝乙太丁子

帝受辛帝乙少子兄微子啟母賤不得嗣辛母正后遂
為嗣辛立為帝天下謂之紂

周成王武王太子太子代立是為成王王少周初定天下周公恐諸侯叛乃攝行政當國七年成王長周公反政北面就羣臣之位羣臣賦敬之

周頌篇名

以進戒嗣王

康王成王太子成王顧命懼太子之不任乃命召公畢公率諸侯以相太子而立之成王既沒二公率諸侯以太子見於先王廟申告以文王武王之所以為王業之不易務在節儉毋多欲以篤信臨之作顧命太子立是為康王遂誥諸侯作康王之誥

既受顧命羣臣陳戒遂報誥之因事曰遂

王出在應門之內

出臯門立應門內之中庭南面

太保率西方諸侯入

應門左畢公率東方諸侯入應門右

二公為二伯各率其所掌諸侯隨其

方為位皆北面

皆布乘黃朱賓稱奉圭兼幣曰一二臣衛敢執

壤奠

賓諸侯也舉奉圭兼幣之辭言一二見非一也為藩衛故曰臣衛來朝而遇國喪遂因見新王敢執

壤地所出而奠贄也

皆再拜稽首王義嗣德答拜

諸侯拜送幣而首至地盡禮也

康王以義繼先人明德答其拜受其幣

太保暨芮伯咸進相揖皆再拜稽

首

冢宰與司徒皆共羣臣諸侯並進陳戒不言諸侯以內見外

曰敢敬告天子皇天

改大邦殷之命

上天改大國殷之命謂誅紂也

惟周文武誕受美若

克恤西土

言文武大受天命而順之能
憂我西土之民本其所起

惟新陟王畢協

賞罰戡定厥功用敷遺後人休

惟周家新升王位當盡
協和天下賞罰能定其

功以遺
後人

今王敬之哉

敬天道務崇
先人之美

張皇六師無壞我高

祖寡命

言當張大六師之衆無
壞我高祖寡有之教命

王若曰庶邦侯甸男衛

順其戒而告之不
言羣臣以外見內

惟予一人釗報誥

報其
戒

昔君文武丕

平富不務咎

言先君文武道大政
化平美不務咎惡

底至齊信用昭明于

天下

至行至中信之道因顯
明于天下言聖德洽

則亦有熊羆之士不二心

之臣保乂王家

言文武既聖則亦有勇猛如熊羆之
士忠一不二心之臣共安治王家

用

端命於上帝皇天用訓厥道付畀四方

君聖臣良受端直之命于上天

天用順其道付與四方之國王天下

乃命建侯樹屏在我後之人

言文武乃施政

令立諸侯樹以為藩屏傳王業在我後之人謂子孫

今予一二伯父尚胥暨顧綏

爾先公之臣服于先王

天子稱同姓諸侯曰伯父言今我一二伯父庶幾相與顧念文

武之道安汝先公之臣服于先王

雖爾身在外乃心罔不在王室

言雖汝身

在外土為諸侯汝心常當忠篤無不在王室熊羆之士勵朝臣此督諸侯也

用奉恤厥若無

遺鞠子羞

當各用心奉憂其所行順道無自荒怠遺我推子之羞辱稚子康王自謂也

羣公

皆既聽命相揖趨出

已聽誥命趨出罷退諸侯歸國朝臣就次

王釋冕反喪

服

脫去黼冕反服
喪服居倚廬

昭王康王子

穆王昭王子昭王南巡守不返卒于江上乃立子滿是
謂穆王

恭王穆王子

懿王恭王子

孝王恭王弟

夷王懿王太子孝王終諸侯立之

厲王夷王子

宣王厲王太子厲王即位三十年好利以榮夷公為卿士用事召穆公虎諫不聽國人相與畔襲厲王王出奔於彘太子靜匿召公之家國人圍之召公乃以其子代王太子召公周公二相行政十四年厲王死於彘太子靜長於召公家二相並立之

幽王宣王子

平王幽王子幽王為犬戎所殺於是諸侯乃即申侯而

共立故幽王太子宜臼是為平王以奉周祀

桓王平王孫平王太子泄父蚤死立其子林是為桓王

莊王桓王子

釐王莊王子

惠王釐王子

襄王惠王子

頃王襄王子

匡王頃王子

定王匡王弟

簡王定王子

靈王簡王子

景王靈王子

悼王景王子

敬王景王子景王十八年后太子聖而早卒二十年景王愛子朝欲立之會崩子丐之黨與爭立國人立長子猛為王子朝攻殺猛為悼王晉人攻子朝而立丐是為

敬王 敬王猛母弟

元王敬王子

定王元王子 一曰貞定王

哀王定王子

思王哀王弟哀王立三月思王弑哀王而自立

考王思王弟思王立五月考王弑思王而自立

威烈王考王子

安王威烈王子

烈王安王子

顯王烈王弟

慎靚王顯王子

赧王慎靚王子

漢惠帝高祖太子高祖十二年四月自太子即位

文帝高祖中子惠帝娶魯元公主女為皇后帝無子取
後宮美人子名之以為太子惠帝晏駕太子立為皇帝
年幼呂后臨朝四年幽之永巷立恒山王弘為皇帝八

年太后喪諸呂謀為亂丞相陳平太尉周勃朱虛侯章
既誅諸呂諸大臣相與陰謀以為少帝及三弟為王者
皆非孝惠子復共誅之使人迎代王代王乃遣太后弟
薄昭見勃勃等具言所以迎立王者昭還報曰信矣乃

令宋昌驂乘

乘車之法尊者居左御者居中又有一人處車中右以備傾側是以戎事則稱車右

其餘則曰驂乘驂者三也蓋取諸三人為名義耳

張武等六人乘詣長安至高

陵止而使宋昌先之長安觀變昌至渭橋

在長安丞相北三里

已下皆迎昌還報代王乃進至渭橋羣臣拜謁稱臣代

王下拜太尉勃進曰願請間

間容也猶今言中間也請容暇之頃當有所陳不欲

於衆顯論也

宋昌曰所言公公言之所言私王者無私太尉

勃乃跪上天子璽代王謝曰至邸而議之既入代邸羣

臣從至上議願代王即天子位代王曰奉高帝宗廟重

事也寡人不佞

不佞不材也

不足以稱

稱副也音尺孕切

願楚王計

宜者

楚王名交高帝弟也

寡人弗敢羣臣皆伏固請代王西鄉讓

者三南鄉讓者再

讓羣臣也鄉讀曰嚮

丞相平等皆曰臣伏計之

大王奉高祖宗廟社稷計不敢忽願大王幸聽臣等臣

謹奉天子璽符再拜上代王曰宗室將相王列侯以為

其宜寡人寡人不敢辭遂即天子位羣臣以次侍使太

僕夏侯嬰東牟侯興居先清宮

舊典天子行幸所至必遣靜室令先按行清靜

殿中以虞非常

奉天子法駕迎代邸

法駕者侍中駟乘八車即御屬車三十六乘

皇

帝即日夕入未央宮夜拜宋昌為衛將軍領南北軍張

武為郎中令行殿中

行謂業行也

還坐前殿大赦天下

景帝文帝太子後七年六月丁未即皇帝位

武帝景帝中子後三年正月甲子自太子即皇帝位

昭帝武帝少子後元二年二月立為太子年八歲大司

馬大將軍霍光等受遺詔輔少主政事一決於光初征

和二年衛太子為江充所敗

衛太子即戾太子也其母衛氏

而燕王旦

廣陵王胥皆多過失是時武帝年老帝母寵姬鈞弋趙

婕妤武帝心欲以為嗣命大臣輔之察羣臣惟光任大

責重可屬社稷廼使黃門畫者畫周公負成王朝諸侯

以賜光至是武帝游五柞宮病篤光涕泣問曰如有不

諱誰當嗣者武帝曰君未諭前畫意耶立少子君行周

公之事光頓首讓曰臣不如金日磾日磾亦曰臣外國人不如光武帝以光為大司馬大將軍日磾為車騎將軍及太僕上官桀為左將軍搜粟都尉桑弘羊為御史大夫皆拜卧内牀下明日武帝晏駕遂即帝位元鳳四年正月丁亥帝加元服見于廟

元服謂加冠也禮曰今月吉辰加爾元服元首也

宣帝武帝曾孫衛太子孫也生數月遭巫蠱事坐收繫郡邸獄

謂諸郡邸置獄也巫蠱獄收繫者衆故寄在郡邸獄

因大赦廷尉監邴吉

載送祖母史良娣家後有詔掖庭養視上屬籍宗正元
平元年四月昭帝晏駕無嗣大將軍霍光請皇后徵昌
邑王賀六月丙寅王受皇帝璽綬尊皇后曰皇太后癸
巳光奏王賀淫亂請廢之會丞相以下議定所立廣陵
王已前不用及燕刺王反誅其子不在議中近親唯有
衛太子孫號皇曾孫在民間咸稱述焉光遂復與丞相
楊敞等上奏曰禮曰人道親親故尊祖尊祖故敬宗太
宗亡嗣擇支子孫賢者為嗣孝武皇帝曾孫病已武帝

時有詔掖庭養視至今年十八師受詩論語孝經躬行節儉慈仁愛人可以嗣孝昭皇帝後奉承祖宗廟子萬姓臣昧死以聞皇太后詔曰可光遣宗正劉德至曾孫家尚冠禮洗沐賜御衣太僕以軫獵車迎曾孫就齋宗正寺入未央宮見皇太后封為陽武侯已而光奉上皇帝璽綬謁于高廟

元帝宣帝太子黃龍元年十二月癸巳即皇帝位

成帝元帝太子宣帝時為世嫡皇孫宣帝愛之竟寧元

年六月己未自太子即皇帝位

哀帝元帝庶孫定陶恭王子年十七徵為皇太子綏和
二年四月丙午即皇帝位

平帝元帝庶孫中山孝王子元壽二年六月哀帝晏駕
大司馬董賢自殺太皇太后詔新都侯王莽為大司馬
領尚書事七月遣車騎將軍王舜大鴻臚左咸使持節
迎中山王九月辛酉中山王即皇帝位年九歲在位五
年為莽所酖莽立宣帝元孫子嬰為皇帝年二歲嬰立

三年為莽所廢

後漢明帝光武第四子

光武事具帝
王中興門

中元二年二月戊

戌自皇太子即位

章帝明帝第五子永平十八年八月壬子自皇太子即

皇帝位

和帝章帝第四子章和二年二月壬辰自皇太子即皇

帝位

殤帝和帝少子元興元年十二月辛未夜即皇帝位時

誕育百餘日

安帝清河王慶之子初封長安侯延平元年慶始就國
鄧太后特詔留帝清河邸八月殤帝晏駕太后與兄車
騎將軍鄧騭定策禁中其夜使騭持節以王青蓋車迎
帝齋於殿中皇太后御崇德殿百官皆吉服羣臣陪位
引拜帝為長安侯皇太后詔曰先帝聖德淑茂早棄天
下朕奉皇帝夙夜瞻仰日月星辰冀望成就豈意率然
顛沛天年不遂悲痛斷心朕惟平原王素被痼疾念宗

廟之重思繼嗣之統唯長安侯祐質性忠孝小心翼翼能通詩論篤學樂古仁惠愛下年已十三有成人之志親德係後者莫宜于祐禮昆弟之子猶己子春秋之義為人後者為之子不以父命辭王父命其以祐為孝和皇帝嗣奉承祖宗案禮儀奏又作策命曰惟延平元年秋七月癸丑皇太后曰咨長安侯祐孝和皇帝懿德魏巍光於四海大行皇帝不永天年朕惟侯孝章帝世嫡皇孫謙恭慈順在孺而勤宜奉郊廟統承大業今以侯嗣

孝和皇帝後其審君漢國允執其中一人有慶兆民賴
之皇帝其勉之哉讀冊畢太尉奉上璽綬即皇帝位年
十三太后猶臨朝永初三年正月庚子皇帝加元服
北鄉侯章帝孫濟北惠王壽之子安帝延光四年二月
太后兄大鴻臚閻顯為車騎將軍定策禁中立之乙酉
即皇帝位

順帝安帝之子母李氏為閻皇后所害永寧元年立為
皇太子延光三年安帝乳母王聖大長秋江京中常侍

樊豐譖太子乳母王男厨監邴吉殺之太子數為歎息
王聖等懼有後禍遂與豐京共構陷太子太子坐廢為
濟陰王明年三月安帝晏駕北鄉侯立濟陰王以廢出
不得上殿親臨梓宮悲號不食內外羣僚莫不哀之及
北鄉侯薨車騎將軍閻顯及江京與中常侍劉安陳達
等白太后秘不發喪而更徵立諸侯國王子乃閉宮屯
兵自守十一月丁巳京師及郡國十六地震是夜中黃
門孫程等十九人共斬江京劉安陳達等迎濟陰王於

德陽殿西鐘下即皇帝位年十一近臣尚書以下從輦到南宮登雲臺召百官尚書令劉光等奏言孝安皇帝聖德明茂早棄天下陛下正統當奉宗廟而姦臣交搆遂令陛下龍潛藩國羣僚遠近莫不失望天命有常北鄉不永漢德盛明福祚孔彰近臣建策左右扶翼內外同心稽合神明陛下踐祚奉遵鴻緒為郊廟主承續祖宗無窮之烈上當天心下厭民望而即位倉卒典章多缺請條案禮儀分別具奏制曰可乃召公卿百僚使虎

賁羽林士屯南北諸門閤顯兄弟聞帝立率兵入北宮尚書郭鎮與交鋒必遂斬顯弟衛尉景戊午遣使者入省奪得璽綬乃幸嘉德殿遣侍御史持節收閤顯及其弟城門校尉耀執金吾晏竝下獄誅

冲帝順帝之子建康元年八月庚午自皇太子即皇帝位年二歲

質帝章帝玄孫渤海王鴻之子永嘉元年正月冲帝晏駕太尉李固以清河王蒜年長有德欲立之謂大將軍

梁冀曰今當立帝宜擇長年高明有德任親政事者願將軍審詳大計察周霍之立文宣戒鄧閻之利幼弱冀不從乃立帝年八歲

桓帝章帝曾孫蠡吾侯翼之子襲爵為侯本初元年梁太后徵帝到夏門亭將妻以女弟會質帝晏駕太后遂與兄大將軍冀定策禁中閏月庚寅使冀持節以王青蓋車迎帝入南宮丁丑封建平侯其日即皇帝位年十五初李固議立嗣因引司徒胡廣司空趙戒先與冀書

曰天下不幸乃遭大憂皇太后聖德當朝統攝萬機明將軍體位忠孝憂存社稷而頻年之間國祚三絕今當立帝天下重器誠知太后垂心將軍勞慮詳擇其人務存聖明然愚情眷眷竊獨有懷遠尋先世廢立舊儀近見國家踐祚前事未嘗不詢訪公卿廣求羣議今上應天心下合衆望且永初以來政事多謬地震宮廟彗星竟天誠是將軍用情之日傳曰以天下與人易為天下得人難昔昌邑之立昏亂日滋霍光憂媿發憤悔之折

骨自非博陸忠勇延年英發大漢之祀幾將傾矣至憂
至懼可不熟慮悠悠萬事唯此為大國之興衰在此一
舉冀得書乃召三公中二千石列侯大議所立固廣戒
及大鴻臚杜喬皆以為清河王蒜明德著聞又屬最尊
親宜立為嗣先是蠡吾侯志嘗取冀妹時在京師冀欲
立之衆論既異憤憤不得志而未有以相奪中常侍曹
騰等聞而夜往說冀曰將軍累世有椒房之親乘攝萬
機賓客縱橫多有過差清河王嚴明若果立則將軍受

禍不久矣不若立蠡吾侯富貴可長保也冀然其言明日重會公卿冀意氣怙怙而言辭激切自胡廣趙戒以下莫不懾憚之皆曰惟大將軍命而固獨與杜喬堅守本議冀厲聲曰罷會固意既不從猶望衆心可立復議以書勸冀愈激冀乃說太后先策免固竟立蠡吾侯是為桓帝

靈帝章帝孫解瀆亭侯萇之子襲侯爵永康元年十二月桓帝晏駕無子皇太后與父城門校尉竇武定策禁

中使守光祿大夫劉儵持節將左右羽林至河間奉迎
明年正月己亥帝到夏門亭竇武持節以王青蓋車迎
入殿中庚子即皇帝位年十二改元建寧元年四年春
正月甲子帝加元服

弘農王辨靈帝子中平六年四月戊午即皇帝位初靈

帝何皇后生皇子辨王貴人生皇子協

即獻帝也

羣臣請帝

立太子帝以辨輕佻無威儀不可為人主然皇后有寵
兄進又居重權故久不決至是帝疾篤屬協於上軍校

尉蹇碩碩既受遺詔且素輕忌於進兄弟及帝晏駕碩時在內欲先誅進而立協及進從外入碩司馬播隱與進有舊迎而目之進驚馳從他道歸營引兵入屯北郡即因稱疾不入碩謀不行皇子辨乃即位年十七八月為董卓所廢

獻帝靈帝中子中平六年九月甲戌司空董卓廢弘農王立帝年九歲興平元年正月甲子帝加元服

魏明帝文帝太子黃初二年為齊公三年為平原王以

其母誅故未建為嗣七年五月文帝疾篤乃立為皇太子
子丁巳即皇帝位

齊王明帝養子初帝無子養王及秦王詢官省事秘莫
有知其所繇來者青龍三年封為齊王景初三年正月
丁亥朔帝病甚乃立為皇太子是日即皇帝位大赦秋
七月始親臨聽公卿奏事正始四年正月帝加元服

高貴鄉公文帝孫東海定王霖之子正始五年封剡縣
高貴鄉公嘉平五年九月齊王廢公卿議迎立公十月

已丑公至于玄武館羣臣奏請舍前殿公以先帝舊處
避止西廂羣臣又請以法駕迎公不聽庚寅公入于雒
陽羣臣迎拜西掖門南公下輿將答拜僨者請曰儀不
拜公曰吾人臣也遂答拜至止車門下輿左右曰舊乘
輿入公曰吾被皇太后徵未知所為遂步至太極東堂
見于太后其日即皇帝位於太極前殿百寮陪位者欣
欣焉

陳留王武帝孫燕王宇之子甘露三年封安次縣常道

鄉公五年五月高貴鄉公為成濟所弑公卿議迎立公
六月甲寅入于雒陽見皇太后是日即皇帝位於太極
前殿



冊府元龜卷九

欽定四庫全書

冊府元龜卷十

宋 王欽若等 撰

帝王部

繼統第二

晉惠帝武帝第二子秦始三年立為皇太子時年九歲
太熙元年四月己酉即皇帝位

懷帝武帝第二十五子惠帝永興元年十二月丁亥立
為皇太弟光熙元年十一月庚午惠帝晏駕羊皇后以

為太弟於嫂不得為太后催清河王暉入已至尚書閣
侍中華混等急召太弟癸酉即皇帝位

愍帝武帝孫吳孝王晏之子出繼伯父東襲封為秦王
永嘉二年拜散騎常侍撫軍將軍及雒陽傾覆避難於
滎陽密縣與舅荀藩荀組相遇自密南趨許潁豫州刺
史閻鼎與前撫軍長史王毗司徒長史劉疇中書郎李
昕及荀組等同謀奉帝歸于長安而疇等中途復叛鼎
追殺之藩組僅而獲免鼎遂挾帝乘牛車自宛趨武關

頻遇山賊士卒亡散次于藍田鼎告雍州刺史賈疋疋
遽遣州兵迎衛達於長安又使輔國將軍梁綜取守之
時有玉龜出灞水神馬鳴城南焉六年九月辛巳奉秦
王為皇太子登壇告類建宗廟社稷大赦明年四月丙
午奉懷帝凶問舉哀成禮壬辰即皇帝位大赦改元建
興

明帝元帝長子太興元年立為皇太子永昌元年閏十
一月庚寅即皇帝位

成帝明帝長子太寧三年戊辰立為皇太子閏八月己丑即皇帝位

康帝成帝母弟咸和元年封吳王二年徙封瑯琊王咸康五年遷侍中司徒八年六月庚寅成帝不諱詔以瑯琊王為嗣甲午即皇帝位

穆帝康帝子建元二年九月丙申立為皇太子己亥太子即皇帝位時年三歲皇太后攝政升平元年帝加元服正月告于太廟始親萬機皇太后居崇德宮

哀帝成帝長子咸康八年封為瑯琊王永和三年除驃
騎將軍五年五月丁巳穆帝晏駕皇太后令曰帝奄不
救厥疾繼嗣未建瑯琊王丕中興正統明德懋親昔在
咸康屬當儲貳以年在幼冲未堪國難故顯宗高讓今
義望情地莫與為比其以王奉大統於是百官備法駕
迎于瑯琊第庚申即皇帝位十月詔曰顯宗成皇帝顧
命以時事多艱弘高世之風樹德博重以隆社稷而國
故不已康穆早世裔祚不融朕以寡德復承先緒感惟

永慕悲痛兼推夫昭穆之義固宜本之天屬繼體承基
古今常道宜上嗣顯宗以修本統帝於穆帝為從父昆
弟穆帝舅褚叡有表中書答表朝廷無其義詔下議尚
書僕射江彪等四人云閔僖兄弟也為父子則帝應為
穆帝嗣衛軍王術等二十五人云成帝不私親愛越授
天倫康帝受顯宗社稷之重已移所授纂承之序宜繼
康皇尚書謝奉等六人云繼體之正宜本天屬考之人
情宜繼顯宗時多異議尚書左丞孔嚴與丹陽尹庾劼

議曰順本居正親親不可奪宜繼成皇帝諸儒咸以嚴議為長竟從之

海西公哀帝之母弟也咸康八年封為東海王升平五年改封瑯琊王隆和初轉侍中驃騎大將軍開府儀同三司興寧三年二月丙申哀帝晏駕無嗣丁酉皇太后詔曰帝遂不救厥疾艱禍仍臻遺緒泯然哀慟切心瑯琊王奕明德茂親屬當儲嗣宜奉祖宗纂承天統便速正大禮以寧人神於是百官奉迎於瑯琊第是日即皇

帝位

簡文帝元帝之少子永昌元年封瑯琊王咸和元年徙封會稽王太和元年海西公廢皇太后詔曰丞相錄尚書會稽王體自中宗明德邵令英秀玄虛神棲事外以具瞻允塞故阿衡三世道化宣流人望攸歸為日已久宜從天人之心以統皇極主者明依舊典以時施行於是大司馬桓溫率百官進太極前殿具乘輿法駕奉迎帝於會稽邸於朝堂變服着平巾幘單衣東向拜受璽

綏咸安元年冬十一月己酉即皇帝位桓溫出次中堂
分兵屯衛

孝武帝簡文第三子興寧三年七月封會稽王咸安二
年七月己未立為皇太子是日即皇帝位皇太后臨朝
太元元年正月壬寅朔帝加元服見于太廟皇太后歸
政甲辰大赦改元丙午帝始臨朝

安帝孝武長子太元十二年八月辛巳立為皇太子二
十一年九月庚申孝武晏駕辛巳太子即皇帝位大赦

癸亥以司徒會稽王道子為太傅攝政

恭帝安帝母弟初封瑯琊王為大司馬義熙十四年十
二月相國宋公劉裕矯稱安帝遺詔曰惟我有晉誕膺
明命業隆九有光宅四海朕以不德屬當多艱幸賴宰
輔拯厥傾覆仍恃保佑克黜禍亂遂冕旒宸極混一六
合方憑阿衡惟新洪業而構疾大漸將遂弗興仰惟靈
命親賢是荷咨爾大司馬瑯琊王體自先皇明德光懋
屬惟儲貳衆望攸集其君臨晉邦奉係宗祀允執其中

燮和天下闡揚末誥無廢我高祖之景命是日即帝位

後魏太宗明元帝道武長子

道武事具帝王創業門

初封齊王母

劉貴人賜死帝日夜號泣道武怒之帝懼乃遊行逃于外天賜六年十月清河王紹作逆帝入誅紹壬辰即皇帝位

世祖太武帝明元長子泰常七年封泰平王監國八年十月壬申即皇帝位

高宗文成帝太武之孫恭宗景穆帝長子太武愛之常

置左右號世嫡皇孫正平二年十月戊申即皇帝位於
永安前殿

顯祖獻文帝文成長子太安二年二月立為皇太子和
平六年五月甲辰即皇帝位

高祖孝文帝獻文太子初獻文雅薄時務嘗有遺世之
心欲禪位於叔父京兆王子推任城王雲太尉源賀固
諫之東陽公丕等進言曰皇太子雖聖德夙彰然實冲
幼陛下富於春秋始覽機政普天景仰率土僭心欲隆

獨善不以萬物為心其若宗廟何其若億兆何曰儲宮
正統受終文祖羣公相之有何不可皇興五年八月冊
命太子曰昔堯舜之禪天下也皆繇其子不肖若丹朱
商均能負荷者豈搜揚仄陋而授之哉爾雖幼冲有君
人之表必能恢隆王道以濟兆民今使太保建安王陸
馥太尉源賀持節奉皇帝璽綬致位於爾躬其踐昇帝
位克廣洪業以光祖宗之休烈使朕優游履道頤神養
性可不善歟丁未詔曰朕纂承洪業運屬太平淮岱率

從四海清晏是以希心玄古志存澹泊躬覽萬務則損
頤神之和一日或曠政有淹滯之失但子有天下歸尊
於父父有天下傳之于子今稽協靈運考會羣心爰授
儲宮踐昇大位朕方優游恭已棲心浩然社稷乂安克
廣其業不亦善乎百官有司其祇奉嗣予以答天休宣
布宇內咸使聞悉於是羣公奏曰昔三皇之世澹泊無
事故稱皇是以漢高祖既稱皇帝尊其父為太上皇明
不統天下今皇帝幼冲萬機大政猶宜陛下總之謹上

尊號太上皇帝乃從之己酉太上皇帝徙御崇光宮采椽不斷土階而已國之大事咸以聞是月丙午太子即皇帝位於太華前殿

世宗宣帝孝文第二子太和二十三年四月丁巳自皇太子即皇帝位於魯陽先是三月庚子孝文疾甚車駕北次穀塘原甲辰詔賜皇后馮氏死詔司徒彭城王勰徵太子於魯陽踐祚詔以侍中護軍將軍北海王詳為司空公鎮南將軍王肅為尚書令鎮南大將軍廣陽王

嘉為尚書左僕射尚書宋弁為吏部尚書與侍中太尉
公僖尚書右僕射任城王等六人輔政顧命宰輔曰粵
太尉司空尚書令左右僕射吏部尚書惟我太祖丕丕
之業與四象齊茂累聖重明屬鴻歷於寡昧兢兢業業
思纂乃聖之遺跡遷都嵩極定鼎河瀍庶蕩甌吳復理
萬國以仰光七廟俯濟蒼生天奪其年不果乃志公卿
其善毗繼子隆我魏室不亦善歟可不勉之帝即位居
諒闇委政宰輔景明二年正月始親政引見羣臣於太

極前殿告以覽政之意

肅宗孝明帝宣武第二子延昌元年十月乙亥立為皇太子四年正月丁巳夜即皇帝位

敬宗孝莊帝彭城王勰之第三子孝昌二年封長樂王武泰元年二月孝明晏駕大都督爾朱榮以兵向京師四月戊戌立為皇帝

前廢帝

諡曰簡閱

廣陵惠王羽之子正始中襲爵正光中元

又擅權帝托以瘖病及莊帝晏駕爾朱世隆等上表勸

進王答曰自量眇身是以執讓然王公勤至不可拒違
今敬承所陳唯愧弗堪負荷耳太尉公爾朱度津奉璽
綬袞冕之服及就輅車百官侍衛入自建春雲龍門昇
太極前殿羣臣拜賀禮畢遂登閭闔門改元肆赦

後廢帝章武王融第二子初建明二年為渤海太守及
齊獻武王高歡起義兵將誅暴逆乃推戴之十月壬寅
即皇帝位於信都城西昇壇焚燎大赦稱中興元年

西魏武帝

亦曰
出帝

孝文帝孫廣平武穆懷王第三子普泰

元年加侍中尚書右僕射中興二年四月後廢帝自以
疎遠未允四海之心請遜大位大丞相渤海王高歡與
百僚會議僉謂高祖不可無後乃共奉王戊子即皇帝
位於東郭之外

文帝孝文帝孫京兆王愉之子永熙二年閏十二月帝
自南陽王為周太祖所立

廢帝文帝長子大統元年正月立為皇太子十七年三
月太子即皇帝位

恭帝文帝第四子大統十四年封為齊王廢帝三年正月為周太祖所立三年禪於周

後周世宗明帝太祖長子初封寧都郡公為岐州刺史
孝閔帝元年九月晉公護廢立遣使迎帝於岐州九月
癸亥至京師止于舊邸甲子羣臣上表勸進備法駕奉
迎帝固讓羣臣固請是日即天王位乙丑朝羣臣於延
壽殿

武成元年正月己酉太師晉公護上表歸政帝始親覽

萬機軍旅之事護猶總焉

高祖武帝太祖第四子明帝即位初為蒲州刺史武成元年入為大司空二年四月明帝遺詔傳位帝固讓百官勸進乃從之壬寅即皇帝位

宣帝高祖長子建德元年立為皇太子宣政元年六月丁酉高祖晏駕戊戌太子即皇帝位

靜帝宣帝長子大象元年正月封魯王是月立為皇太子二月宣帝詔曰有聖大寶實惟重器玄天表命人事

與能幽顯同謀確乎不易域中之大寶懸定於杳冥天下為公蓋不避於內舉我大周感蒼昊之精受河雒之錫武功文德光格區宇創業垂統永惟無窮朕以寡薄祇承洪緒上賴先朝得一之迹下藉羣后不貳之心職貢與雲雨俱通憲章共光華並且圓首方足咸登仁壽興隆國本用弘天歷皇太子地居上嗣正統所歸遠惟積德之休允叶無疆之祚帝王之量未肅而成天祿之期不謀已至朕今傳位於衍乃睠四海深合謳歌之望

俾予一人高蹈風塵之表萬方兆庶知朕意焉

隋煬帝高帝第二子

高帝事迹具帝王創業門

開皇八年立為皇太

子仁壽四年七月即皇帝位於仁壽宮

恭帝元德太子之子大業三年封陳王又徙為代王十三年十月唐高祖義兵入長安尊煬帝為太上皇帝奉帝纂業壬戌即皇帝位於大興殿尋禪於唐

唐太宗文皇帝高祖第二子

高祖事迹具帝王創業門

武德元年封

秦王九年六月癸亥立為太子軍機兵仗倉糧凡厥庶

政事無大小悉委皇太子斷決然後聞奏是月壬申高祖手詔司空裴寂等曰朕當加尊號為太上皇有司擇日宜速聞奏八月癸亥高祖詔曰乾道統天文明於是馭歷大寶曰位宸極所以居尊在昔勛華不昌厥緒揖遜之禮旁求歷試三代以降天下為家繼體承基裔嗣相襲故能孝饗宗廟卜世長遠貽慶後昆克隆鼎祚朕膺期受命握圖闡極大拯橫流載寧區夏然而昧且丕顯日是坐朝馭朽兢懷履冰在念憂勤庶政九載于茲

今英華已竭耄期倦勤久懷物表高蹈風雲釋累遺塵
有同脫屣深求閒逸用保休和皇太子世民久叶祥符
夙彰竒表天縱神武智韞機深自雲雷締構霸業伊始
義旗之舉首創成規京邑克平莫非其力乃皇極已建
天步猶艱內發謀猷外清氛祲英圖冠世妙算窮神伐
暴除凶無思不服薛舉負西戎之衆武周引北狄之兵
禍起蜂飛假名竊號元戎所指折首傾巢王世充藉府
庫之資憑山河之固信臣精卒承間守險建德因之同

惡相濟金鼓纔震一縱兩擒師不踰時戎衣大定夷劉
闡於趙魏覆徐朗於譙充功格穹蒼德孚宇宙雄才宏
畧振古莫傳造我大唐繫其是賴既而居中作相任隆
列辟百揆時總三階以平地屬元良實惟固本萬邦咸
正兆庶樂推畧律呈象休徵允集華夏載佇謳頌知歸
今傳皇帝位於世民所司備禮以時冊授公卿百官四
方岳牧及長吏下至士民宜悉祇奉以稱朕意夫政惟
通變禮貴從宜利在因民義存適要條章法度不便於

時者隨時改易勿有疑滯昔漢祖撥亂身定大功羣臣
推奉光宅帝位而事父資敬五日一朝備禮尊崇號稱
太上朕方游心恬淡安神玄默無為拱揖憲章往古稱
謂之儀一准漢代庶宗社之固申錫無疆天祿之期永
安勿替布告天下咸使知聞太宗冲讓不敢奉詔翌日
朝于西宮面奏請曰堯舜雖有至德有禪授之事然親
覽庶政並經百年陛下以至聖之德撫有四海始將十
載臣望陛下遵堯舜之道以百姓為心高祖曰吾思此

事已熟懷之已久故欲怡神以養生不欲矯情以從物
惟恐性不能盡歡娛身不能恣逸樂目不能觀五色耳
不能聽五音口不能極膏腴鼻不能嗅芬馥今傳授得
所業泰身安此是怡神以養生會吾之宿志若乃飾仁
義務知能勞神以施號令疲形以行賞罰此是矯情以
從物非吾心之所取也夫善治外者不傷性善治內者
不累身吾方以道攝生養性故脫屣於汝豈可嬰吾以
負重哉太宗稽首固請高祖曰夫為人子務自勞身致

其親於安樂吾老矣傳汝以萬機若不從是非孝也太
宗弗敢辭於是遣兼太尉司空魏國公裴寂賜策曰夫
天生蒸民樹以司牧三靈輔德百姓與能粵自夏殷傳
業裔祚軌物長世率繇茲道朕祇膺靈命肇開寶歷聲
教所覃無思不服然而萬機填委九區輻湊明發不寐
考極觀書聽政勞神經謀損慮深思閒曠釋茲重負咨
爾聰明神武德實天生君人之量爰備夙夜王業初基
雷雲伊始英謀獨斷祕策潛深及擴定關隴澄清河雒

北通玄塞東靜青丘宏圖遐舉元功克茂氛霧廓清鯨
鯢斯盡澤霑方外聲暢無垠總統機衡百工以乂敷弘
德化四門允穆謳歌所屬宇內宅心象緯告徵靈命斯
在朕是用上稽蒼昊俯順黔黎推而弗居永垂顯號致
皇帝位於爾躬今命司空上柱國魏國公寂尚書左僕
射上柱國宋國公瑀齎璽綬爾其纂承洪緒對揚休命式
隆寶祚以康四海太宗固讓詔不許之甲子太宗即位
于東宮顯德殿遣兼太尉司空裴寂柴燎告天於南郊

曰皇帝臣某敢以玄牡昭告皇皇后帝太上皇厭居宸
極凝情姑射倦此萬機釋茲重負人神不可以乏主天
序不可以無統歷數有歸猥當寡薄神器有奉用集大
命懼忝帝位固辭弗克遂膺大禮臨馭兆民敬簡元日
告類上帝即皇帝位惟神敷祐萬邦永綏天極貞觀三
年四月高祖以弘義宮有山林勝地乃徙居焉改名大
安宮詔曰書云知人則哲唯帝難之易曰通其變使民
不倦故太伯端委周室以隆東海就國漢基方永立權

致治不其然乎朕世襲緇衣家傳鼎業佐魏及周勤勞
王室有隋御歷地居戚里嘗以補天在慮納揆為心大
業道喪皇極如燬傾維折柱天下分離塗炭納隍黔黎
殆盡顧茲九有鋒鏑縱橫靜念持扶計無所出世民幼
懷大度性合天道韞經緯之奇文包湯武之弘畧深謀
秘策沃朕救溺之心壯思雄圖起朕救焚之志因其感
激許以經綸糾合義師投袂而起車次於平陽之郊劍
及於孟津之會元戎所指冰消霧捲曾未浹旬廓清京

邑定非常之業建不世之功三古以來未之聞也朱旗
西指則仁杲喪元白羽東臨則世充泥首推武周如拉
朽收建德若拾遺至若黑闥逋誅圓朗小醜三捷七擒
不可勝計一人之力冠今超古暴之遐邇豈待昌言往
以建成嫡長異其養德日就不謂匿怨友于忌能毀善
讒言屢發殆至鑠金賴天啟朕心宗社降福密悟凶邪
指麾殲殄朕媿受浸潤深念元功乃敬授帝圖先天傳
政懼其溢滿驕上未稱三靈之心縱慾肆情不恤萬方

之重朕故仍居紫極處之肅成察其復禮觀其齊政露
往霜來四載於茲矣比聞思我王度克難克艱昧且不
顯去奢去泰朝夕視膳蒸蒸之性日嚴景憂民翼翼
之情日慎南越稽首北狄欵闕四海晏然五兵偃戢招
君璋之衆只用尺書屠師都之城無虧寸刃公卿輯睦
遠邇乂安金鼓絕於疆場心鏡懸於億兆盡善盡美吾
無間然匪天祐之孰能至此令月吉辰風調雨順朕俯
觀人事仰鑒穹昊當養性別宮使其正位居極宜令有

司具禮務在周備朕得脫屣高蹈擬迹於軒轅授歷傳
璽爰屬於啟誦大寶既固卜年惟永付託有所何樂如
之百辟卿士等或晉陽從我同披荆棘或秦邸故吏早
預腹心並以德舉言揚進忠顯孝保乂社稷天平地成
唯當帶礪山河與國休戚可悉心輔弼無黨無偏罔或
隳哉替爾丕績善事元首稱朕意焉太宗奉表陳讓曰
臣聞至敬無文至誠不飾地居臣子不以小忠撓志情
兼家國不以細行嬰心臣蒙獎厲擢居天策戰必以死

實深愍於黎庶奮不顧命願無忝於宗社規摹指麾皆
稟聖算人心神誘遂得成功安敢貪天自稱已力前以
聖人大寶濫鍾愚懦臣謂肅成理務禮通監撫日慎一
日不敢推辭今奉茲詔更垂獎予以四海乂安褰裳紫
極歸尊軒轅天下幸甚令臣自當啟誦不覺厚顏頌者
陰陽尚愆嘉穀未稔政治有虧刑典不措恐眇身多罪
以及萬方伏願天慈仍安太極待民知堯力玉燭順序
網開湯祝金科削編然後降輦西宮於事非晚付臣宣

室亦敢當仁臣志在忘私冒陳丹款高祖手詔曰君之於臣尚須探察父之審子豈可同常汝夙懷忠孝吾愛汝亦過於諸子况立功德具如前詔所恨吾受讒言幾至投杼上玄降福神器安寧此乃宗廟有靈非獨吾之幸也比察汝布政聽汝德音洋洋盈耳副吾所望昔齊有執政而致小白晉有艱難而獲重耳今天下慶賴在汝一人頃者寒暑不調水旱乖節止是吾之與汝安處未得其位乃致承乾所居非少陽之體吾今往西宮方

思萬代之福汝何勞撝抑頻此言請且深思大道永保社稷善始令終無或懈怠奉行吾詔勿以小讓為懷至公之言彼宮此室勢何殊也異姓賢者尚欲權之今汝已克負荷應茲當璧極慰吾意宜絕常辭也太宗不敢忤意乃止乙亥太上皇居於大安宮太宗親侍輦輦百僚陪從置酒高會極歡而罷甲午太宗正位於太極殿高宗天皇大帝太宗第九子貞觀五年封晉王十七年立為皇太子二十三年春太宗不豫詔太子於金液門

聽政四月從幸翠微宮五月己巳太宗晏駕庚午發自翠微宮至京六月甲戌太子即皇帝位

中宗孝和皇帝高宗第七子母曰天后武氏二歲封周王儀鳳二年徙封英王永隆元年立為皇太子弘道元年十二月太子即位天后臨朝明年正月甲申朔改元嗣聖元年二月戊午天后廢帝為廬陵郡王五月遷於均州尋徙居房陵聖歷元年召赴上都皇嗣

即睿宗也讓位

于帝遂立為皇太子神龍元年正月甲戌天后傳位於

太子乙亥即皇帝位於通天宮之端康殿

睿宗大聖真皇帝中宗母弟龍朔二年封殷王乾封元年改豫王總章二年徙冀王上元三年改相王嗣聖元年皇太后武氏廢中宗為廬陵王文明元年二月立為皇帝太后臨朝天授元年降為皇嗣聖歷元年讓位於中宗復降為相王景龍四年六月少帝即位年十六韋庶人專政庚子帝第三子臨淄王隆基率朝邑縣尉劉幽求長上折衝麻嗣宗內苑總監鍾紹京等討捕韋氏

并其黨與誅之辛丑奉少主御安福門樓大赦天下癸卯王公卿士咸以王室多故義擇長君以帝衆望所歸固請即尊位是日少帝讓于叔父甲辰帝自兩儀殿出於太極殿少帝於殿東隅次幕內西面帝於梓宮側東向太平公主曰少帝欲以此位讓叔父合否幽求跪曰少帝仁孝追蹤舜禹大王恩慈倍過之矣今家國事重有此推讓誠為至公也是日少帝制曰自古帝王必有符命兄弟相及存諸典禮朕以孤藐遭家多難顧茲蒙

識不曉政途茫茫四海將何所屬累聖丕業若墜於地
王室多故義擇長君思與羣公推崇明聖叔父相王高
宗之子昔以天下讓于先帝孝友寬簡彰信非人神龍
之初已有明旨將立太弟以為嗣君因王懇辭未行冊
命所以東宮曠位于今歷年綴衣在辰禍變倉卒後掖
稱制計立冲人欽奉前懷願遵理命上申平昔之文仰
復祖宗之烈起今日請叔父相王即皇帝位朕退守舊
藩歸于外邸凡百卿士敬承朕意贊我天人之休期光

我有唐之洪業帝固讓有制不許是日即皇帝位大赦天下於是降少帝為溫王丙午帝縞服於太極東廊引羣公卿士謂曰朕與蒼生有幸且得社稷安寧自大行晏駕韋氏篡逆元惡大慙並從誅翦嗣皇年幼未曉政途推讓朕躬事非獲已今與卿等相見不勝悲感甲戌命溫王重茂於內宅安厝明年正月以溫王重茂為襄王食巴集等州實封二千戶於集州安置

冊府元龜卷十